


LELU TOWN MUNICIPAL



CHARTER

LELU TOWN MUNICIPAL CHARTER

TABLE OF CONTENTS

Kosraean Language

<u>ARTICLE #</u>		<u>PAGE#</u>
	IN TUKAKIN LA	1 - 2
ARTICLE I	KU FULAT	3
ARTICLE II	GOVERNMENT	3
ARTICLE III	WISYEN MASAP	4 - 5
ARTICLE IV	SROASR MASAP	5 - 7
ARTICLE V	NUNUNKU MASAP	7 - 8
ARTICLE VI	MUKUIKUI KE MONEY A KE TAKMA	8 - 10
ARTICLE VII	ETA AK A MOUL MWOMWO	10
ARTICLE VIII	ARCHIVE, FASIN A KARUNGINYEN MA MATU	11
ARTICLE IX	AN A MA RAUNIKUTLA	11 - 12
ARTICLE X	SULOSOL A SULALA	12 - 13
ARTICLE XI	SISILA A OSRWOSRLA	14
ARTICLE XII	KUTUPA OAKWUK YOK	15 - 16
ARTICLE XIII	NAWEYUK	17
ARTICLE XIV	KAS	17
ARTICLE XV	FULAK KE OFFICE	18
ARTICLE XVI	EKLA LUN CHARTER	19

IN TUKAKUNLA

In oana sie an, kut met ke Town Lelu insesela nuke ma suwoswos: kut met lalalfongi ke God, kut met inse paye nuke government lasr u, kut met insaneang nuke moul lun sou lasr, a kut met lungse muta in misla ye koko lun sie government ma sumwos in aol kut ke ma nukewa su akwuki nu sesr.

Kut, met ke Town Lelu, akkeye lalalfongi lasr ke sumwos lun met, a sumwos lun met mukul a met mutan nukewa. Kut lungse tukeni muta in misla a ataptapi sie sin sie, a in akkeye ekasyen kasrpar a moul mwomwo lun met lasr u.

Kut, met ke Town Lelu, kisakunkutyang nuke karinginyen onangan an sesr in oasku, kato, a mwolana, a in karungunang moul matu lasr su saoklana nu sesr.

Kut, met ke Town Lelu, akkonye mu an Lelu pa infuten oakwuk matu, a fasin lun an Kosrae. Oiya matu su tutafme nu misenge a moul matu lun met lasr su somla pa mokle insiasr a nunak in insaneang lasr in oakiya Town Government se lasr inge ke pusren Akwuk Fulat se inge.

Kut, met ke Town Lelu, lafekinkutla sifwana, yokna in karungunang katoien an sesr u, a oakwuk ke moul matu lasr su, yoklana sekoeya sesr.

Kut, met ke Town Lelu, lalalfongi la pengana len kut fungyang nuke mukuikui sikyak apnani mutunfwal sesr u, a ke State lasr u, in wi pulakin ma nukewa su tuku a mokle mukuikui ke an u: panang kut sang kewa insiasr in karungin moul misla inmasrlon moul matu a moul in pal inge lasr, tu in ku in karungunang ne tok oiya matu, fasin matu lasr, a oayapa pengana len oalana lun moul oakwuk matu lasr u yokyokelik sekoeya sesr.

Kut, met ke Town Lelu, lalalfongi mu lin Charter se inge kut suk in karungunang ma nukewa ma saoklana nu sin met u. Kut lalalfongi mu finsrak lasr kewa a ku in sun ke tukeni insese

lasr in wi mokle government se kut oaki ke kewana finsrak a lalalfongi lun met ke Town Lelu.

Kut, met ke Town Lelu, lalalfongi ke God, kulana Lal ke ma nukewa El orala, su ke El, in pal e nukewa, Town Lelu a karungin a akkapye moul a oiya lun met lal. In sun finsrak lasr ke sripa inge, finsrak ke moul in misla a insesefana, kut, met ke Town Lelu, tukeni insesefana in akfulatye a oayapa tapuk a patok Charter se inge.

(Naweyukla 2019 3rd Lelu Charter Commission)

ARTICLE I. KU FULAT

Section 1. Akwuk se inge pa Masap Fulat ke Lelu Town Government. Kutena akwuk lun government se inge ma kisrung Akwuk Fulat se inge a tufwa tia akilenyuk.

(Naweyukla ke 2019/3rd Lelu Charter Commission)

ARTICLE II. GOVERNMENT

Section 1. Municipality lun an Lelu a fwa pangpang Municipality lun Lelu Town pa.
Government lun Lelu Town a fwa pangpang Lelu Town Government pa.

Section 2. A fwa oakwuki mu oasr Laa Tolu ke Lelu Town Government. Laa Tolu inge a fwa eteyuk mu Wisyen Masap, Sroasr Masap, a Nununku Masap.

Section 3. A tufwa oasr soko flag, mwe akul fulat, a soko anthem lun Lelu Town Government, oakwuk ke ordinance.

(Section 1,2 and Section 3 naweyukla 2019 3rd Lelu Charter Commission).

ARTICLE III. WISYEN MASAP

Section 1. Met kol fulat lun Lelu Town Government a fwa eteyuk a akilenyuk ke wal lun Mayor.
El fwa kulansap ke lusen year akosr. Loes se omeet sie Mayor el ku in takunla kulansap pa year oalkosr. Fwin oasr pal oalalla Office ke Mayor a aolyukla Mayor ke special election, a

Mayor sasu el tafwela pal lula ke term se el nakla an. Sayen fin srik liki year sie (1) pal lula ke term san, Mayor el a tufwa srisrngiyuki sin Sroasr Masap.

(Section 1 naweyukla 2019 3rd Lelu Charter Commission)

Section 2. A tufwa ma kunal Mayor in wis a karungin oakwuk nukewa in Charter se inge.

Section 3. Mayor el enenu elan tia oru kutepana kunokon sayen orekma fulat se inge ke pulan pal se el ekin wal se inge.

Section 4. In ku in suleyukla nu ke Mayor, sie met a fwa tia fusr liki year angaul, el enenu in pepu Lelu, muta Lelu tia fototo liki year limekosr, el met oasr pepu in vote la a wangin masap yok el kunaosla sayen fwin nunak munas nu sel ke oakwuk lun masap year se meet liki pal in vote.

Section 5. A fwa oakwuki ke masap in srisrngiya sie len Mayor elan takin a srumun nu sin Sroasr Masap, Wisyen Masap, Nununku Masap, a met nukewa fwin an Lelu koanon oakwuk ke orekma a musa lun Lelu Town Government ke sie year, akilen kain in mwe fosrngakin mwe elya inge, a srumun tu met u in wi pa eteya a kalem ke oiye government lalos a suk kasru lalos nu ka.

Section 6. Pal nukewa Mayor el wangin in oru kunokon lal ke sripen mas ku kutepana sripa saya, el enenu in srisrngiya sie sin met ma tafwel ke office lal su ma ku a fwal in oru orekma lun Mayor in tafwela ne ke el sifwil mutawaak oru kunokon lal.

Section 7. Fwin ke kutu sripa Mayor el misa, ku mas upa, ku wanginla, a tia ku in tafwela orekma lal in office se inge, a fwin lusen pal lula lal loes liki year se yak na a fwa oasr sie vote sulaklak orekla in nakla seat lal Mayor. Tusruktu, fwin lusen pal lula lal fototo liki year se, na Chairman lun Sroasr Masap ke Lelu Town Government a fwa orala sie masap in sulosol a srisrngiya sie mwet sasu in aksafyela term san akkeyeyukla sin luo tafu tolu sin Sroasr Masap.

Section 8. A fwa oasr ku lal Mayor in tia akkeyela sie lemlem in masap su orekla sin Sroasr Masap a tuku nu yorol in akkeyeyukla. Mayor el enenu in akkalemye tia insese lal inmasrlon len longoul el eis lemlem se, a enenu elan folokonla nu yurin Sroasr Masap tia pat liki len singoul tukin el veto wi sripa su el tia insese nu ka. A fwa oasr pa ku lal Mayor in orekmakin line item veto.

Section 9. Kuneyen met in oru kulansap in akmwoye mukuikui lun Office lal Mayor a tufwa oakwuki ke pusren masap.

Section 10. Suleyen met a oru kunokon ma enenu in fwasr fwal nu ke Charter a masap lun Lelu Town Government enenu in srisrngiyuki sin Mayor a akkeyeyukla sin luo tafu tolu sin Sroasr Masap.

Section 11. Mayor el fosrngakin a liaung ma nukewa lun Lelu Town Government ke pusren masap.

Section 12. Molin Mayor se a tufwa oakwuk ke pusren ordinance. Molin Mayor se tia ku in kilukyak ke term lal an. Molin Mayor se ku in kiluki fwin enenu.

Section 13. Mayor el tufwa eis lela in ngusr mani ke inen Lelu Town Government ke akkeye lun Lelu Town Sroasr Masap. Lelu Town Sroasr Masap a tufwa sroasri ordinance in sang akfwasrye a karungin ngusr mani nukewa lun Town Government.

(Section 13 itukyang ke 2019 3rd Lelu Charter Commission)

ARTICLE IV. SROASR MASAP

Section 1. Ordinance ku pusren masap lun Lelu Town Government a tufwa sroasriyuki sin Lelu Town Sroasr Masap.

Section 2. Lelu Town Sroasr Masap oasr met itkosr ka, solla sin met nukewa ma fwal in vote fwin an Lelu. Mwet nukewa wi Sroasr Masap enenu in kulansap ke term ke lusen ya akosr.

Section 3. Met nukewa wi Sroasr masap enenu in kulansap ke part-time. Naweyuk sasu se inge mutawaak orekmakinyuk ke Thursday akluo in January 2020.

Section 4. Met se tia ku in wi Sroasr Masap el fwin fusr liki year tolngoul, el enenu in pepu Lelu, muta Lelu tia fototo liki year limekosr, el met oasr pepu in vote la a wangin masap yok el kunaosla sayen fwin nunak munas nu sel ke oakwuk lun masap year se meet liki pal in vote.

(Section 1&2 naweyukla ke 2019 3rd Lelu Charter Commission)

Section 5. Fwin allolla an se lun Sroasr Masap year se ku yok liki, enenu in oasr vote elya se in nakla. Fwin tu srik liki year se, Mayor el a srisrngiya sie met a.

Section 6. Molin met nukewa ma orekma ke Lelu Town Government Sroasr Masap a fwa orekla ke pusren masap.

Section 7. Molin members ke Sroasr Masap fwa ituk ke molin len ma el wi session a fwa tia ku in kilukyak selos sifwana, su a tufwa akwuki ke pusren masap.

(Section 7/Naweyukla ke 2019 3rd Lelu Charter Commission)

Section 8. Lelu Town Government Sroasr Masap a fwa sifana sulala Chairman a officer saya lalos ke pusren masap.

Section 9. Mayor el enenu in sign lemlem nukewa ma akkeyeyukla sin Lelu Town Government Sroasr Masap meet liki orala masap lun Lelu Town Government, tusruktu, fwin tia sign

sel Mayor tukin len tolngoul el eis lemlem ingan a fwa orala masap lun Lelu Town Government.

Section 10. A fwa oasr ku lun Lelu Town Government Sroasr Masap in override veto bill akkeyeyuk sin luo tafu tolu members. Sroasr Masap ku in sifwilpa oru orekma lalos ke bill ma vetoiyuki tari ke pulan session san, ku ke regular session ku session elya se toko an.

Section 11. Masap nukewa ma orekmakinyuk u enenu in akkeyeyuk sin akosr met sin Lelu Town Government Sroasr Masap.

Section 12. Oasr muta oakwuk luo in year se lun Lelu Town Government Sroasr Masap a tufwa pang nuke February a August ikak nu sin public. Muta elya a ku in pang sel Mayor ku tufwa pang sin Chairman fwin oasr pusren ngusr simla sin luo-tafu tolu inmasrlon Sroasr Masap.

Section 13. Lemlem nukewa akkeyeyuk sin Sroasr Masap enenu in sign sel Chairman a supeyukla nu sel Mayor.

ARTICLE V. NUNUNKU MASAP

Section 1. Lelu Town Government ku in lumala sie Nununku Masap ku Lelu Town Court ke oakwuk lun masap.

Section 2. Mayor el fwa srisrngiya sie Nununku su enenu in akkeyeyukla ke luo tafu tolu sin Sroasr Masap ke Lelu Town Sroasr Masap. Ke pal oakwuki Lelu Town Court se, a fwa ku in touyak pa sie Nununku an ke oakwuk lun masap.

Section 3. Lelu Town Sroasr Masap a fwa oakiya ma eneneyuk nuke Nununku se ke pusren masap.

Section 4. Met Nununku ke Town Court a fwa tia fusr liki ya tolngoul limekosr, sonna kapur ke sripen el kunaosla masap lulap, a fas ke kutu pa enenu ma a tufwa oakwuk ke pusren ordinance. Met Nununku se enenu pa in yok etu lal ke mukuikui lun masap, kalma pa el orekma ke masap tia supus liki ya limekosr el wi orala, akuteya, karungin ku akfwasrye enenu lun masap, ku sang pusren kasru a kasru met ke mukuikui lun masap.

Section 5. Met Nununku lun Town Court ku in kulansap ke part-time. Molin Met Nununku lun Town Court a tufwa oakwuk ke pusren ordinance.

Section 6. Ku a sumwos nukewa oasr sin Town Court in nununku oiya ma karunginyuk ke masap lun Lelu Town. Ma wotla sin Town Court a fwa ku in kokola longyuk ka an nu sin Nununku lun Kosrae State.

ARTICLE VI. MUKUIKUI KE MONEY A KE TAKMA

Section 1. A tufwa orekla in oasr Treasury se lun Lelu Town Government. In karungin kuh akfwasrye kunokon ku enenu nuke Treasury se inge a tufwa oakwuki mu in oasr office lun Treasury.

Section 2. Mayor el a fwa srisrngiya Treasurer se enenu in akkeyeyukla sin luo-tafu-tolu sin Sroasr Masap. Sukyen met a orekma ka a oayapa naweya la orekma fuka a fwa oakwuk ke masap.

Section 3. Takma a inkanek in ilyak lun money ke Treasury lun Lelu Town Government a fwa oana ke oakwuk in masap lun Lelu Town Government.

(Section 3, naweyukla 2019 3rd Lelu Charter Commission)

Section 4. Money nukewa ma ilyak nu sin Lelu Town Government a fwa fuliyuki a karunginyuk ke Treasury lun Lelu Town. A fwa tia lela in oasr mukuila lun money liki Treasury se

inge sayen in ut ke pusren masap.

Section 5. A fwa kunokon se lun Lelu Town Treasurer in karungin book in accounts lun Lelu Town Treasury oana ke oakwuk ke pusren masap a fwa kunokon se pa lal in ku in orala in eteyuk la fuka fwasriyen Treasury se ingan ke pal a nu sin met masap oakiya.

Section 6. Sroasr Masap a fwa tia oakiya pusren masap in moklela koanon Treasury fwin a tu alukela money ma eteyuk ku motkoeuyuk mu a ilyak nusin Government se inge. Inmasrlon ma mokleyuk ingan masap a fwa oakiye lusen moul lun kais sie project.

Section 7. A fwa tia oasr mokleyan ma lun Town Government, utukla ku orekmakinyuk, sayen fwin ma a mukuila in karungin ku kasru met u.

Section 8. A tufwa ma kunal Mayor elan orala sie budget a supala nu yurin Sroasr Masap meet liki June sie(1) ke year nukewa. Koanon budget se ingan a fwa akkalemye plan in orekmakinyen money, inkanek in ilyak lun money, a kutu pa enenu in kasru in kalem koanon budget se ingan. A fwa kunokon nu sin Sroasr Masap in akkeye ku lain budget se ingan. Sroasr Masap lela in ikikul budget se inge wiwi na liye lalos. Orekmakinyen budget se inge a tufwa akwuki ke pusren masap.

Section 9. A tufwa oasr ilusyen orekmakinyen money lun Lelu Town Government oakwuki ke pusren masap.

Section 10. Sie akwuk in karungin met orekma lun Lelu Municipal Government a fwa oakwuki ke pusren masap.

Section 11. Oakwuk in karungin mukuikui ke money a tufwa oakwuki sin Lelu Town Government ke ordinance.

(Naweyukla ke 2019 3rd Lelu Charter Commission)

Section 12. Lelu Town Government a tufwa oakiya a esani takma a molin ma tia sruu ye Constitution a masap lun FSM a Kosrae State.

Section 13. Tia srik liki percent singuul ke mani ma motkeyuk mu a tufwa utyak ke kais sie fiscal year in srisrila nuke municipal projects.

(Section 12 & 13 itukyang ke 2019 3rd Lelu Charter Commission)

ARTICLE VII. ETAAK A MOUL MWOMWO

Section 1. Lelu Town Government enenu in patok inkaneke in etaak a moul mwomwo.

Section 2. Lelu Town Government a tufwa akola nuke enenu a kena lun met Lelu.

(Section 2. Naweyukla 2019 3rd Lelu Charter Commission)

Section 3. Government lun an Lelu enenu in oakia ke pusren masap sie iwa ke ofus lun Mayor in fosrngakin enenu lun met u ke ip lun karunginyen moul kawil.

Section 4. In akkeye kapkapak mwomwo nuke etaak, moul mwomwo, a in mwo mutangalos, Lelu Town Government a tufwa oakiya matwa in lela ke pusren ordinance, in fal nuke masap lun State.

Section 5. Lelu Town Government a tufwa patok orekmakinyan a eisyen mongo orekla fin an u in akkeye a akmwoye moul mwomwo lun met Lelu a in aksrikyela elya ke Non-Communicable Disease a ma upa tuku ka u.

(Section 4 & 5 itukyang 2019 3rd Lelu Charter Commission)

ARTICLE VIII. ARCHIVE, FASIN A KARUNGINYEN MA MATU

Section 1. Akwuk Fulat lun Lelu Town a tufwa tapuk, akfulatye, a karingin oiya matu a fasin lun met Lelu ku Kosrae.

Section 2. Lelu Town Government a tufwa oakiya ke pusren ordinance sie oiya in karungin archives, fasin, a karunginyen ma matu.

Section 3. Lelu Town Government a tufwa akfulatye a karingin oiya matu a fasin lun met Kosrae. Akwuk ku ordinance a tufwa akwuki in tapuk oiya matu a fasin. Fwin oasr akwuk ku ordinance ma kisrung suwos ma karunginyuk ke Akwuk Fulat se inge, a tufwa akilenyuk fin oasr mwe akpaye in karungin, oana ke liye lun Kosrae State Government.

Section 4. In akkeye a karungin oiya mwomwo inmasrlon sou fin an Lelu, oana ke eneneyuk u, Akwuk Fulat se inge a tufwa akilen a karungin kunokon a ku lun papa a nina nu fin tulik natulos.

(Article VIII, Section 1,2,3,4 itukyung 2019 3rd Lelu Charter Commission)

ARTICLE IX. AN A MA RAUNIKUTLA NUKEWA

Section 1. Municipality lun Lelu Town a tufwa kutakatelik nuke otah. Inen a pusen otah an tufwa akwuki ke pusren masap.

Section 2. Met kol ke Lelu Town Government a tufwa oakiya a patok masap in karungin, akkapye a akmwoye kasrpen an Lelu a ma nukewa rauneak.

Section 3. Kalmen Ma raunikutla nukewa ke Akwuk Fulat se inge pa onangasr, ma nukewa ma oasr moul la a wangin moul la.

Section 4. Mayor el a tufwa akfwasrye longyuk yurin met u in sramsramkin oiya in akmwoye onangasr, su kupasr nuke sulosolla lun sie ipin an in orekmakinyuk nuke sripa lun kulyuk lun met nukewa

a oiya saya ma kupasr nuke ekla yok nuke onangasr. Fin oasr aetuila se lun met nukewa, Mayor el a tufwa sang nusin Sroasr Masap su a fwa lumala masap fal ke pusren ordinance, regulation, ku kutena masap saya.

(Section 1&2 naweyuk, Section 3&4 itukyang, 3rd Lelu Charter Commission)

ARTICLE X. SULOSOL A SULALA

Section 1. Sulosol nuke wal nukewa ma a voteiyuk fwa orek sin met nukewa fwal nuke Charter se inge, a masap saya ma kupasr nu ka. Oakwuk ten inge a fwa orekmakinyuk nuke sulosol lun Lelu Town Government.

- a). ke sulosol nuke wal lun Mayor, met suleyuk se ma sruokya inkaiyen pusen vote ke vote nukewa ma oaoala a fwa eteyuk mu el sikyak. A fwin sikyak tu wangin met suleyuk se sruokya inkaiyen vote ke vote oaoala, na sulosol elya se a fwa sifwil orek inmasrlon met luo ma pus omeet vote la an. Met se ma sikyak ke sulosol elya se inge pa a eteyuk mu sikyak ke sulosol san u.
- b). Ke sulosol nuke Lelu Town Sroasr Masap, met suleyuk itkosr ma pus omeet pusen vote la pa a eteyuk mu sikyak u.
- c). Fwin oasr oana sie ke sulosol se inge nu ke met se akitkosr, a fwa oasr sulosol se inmasrlon met suleyuk ma oana sie vote la an.

Section 2. Kais sie sulosol a fwa orek ke year akosr nukewa sayen sulosol elya a vote saya ma akkeyeyukla ke masap. Inkaiyen met ku in vote Lelu pa a sulala kais sie nunak ke oiya ma touyak nusin met u in sule sayen fwin akkalemyeyuk ke Charter se inge ku ke masap.

(Naweyukla 2019 3rd Lelu Charter Commission)

Section 3. Vote a fwa orek in lukma ke pepu in vote. Pepu in vote nukewa ma simla ke sulosol lun Lelu Town Government a fwa utukla nuke Town Office in oaoala.

Section 4. Sroasr Masap a fwa lumala oakwuk nuke simusyen met ku in vote, sukyen met in voteiyuk, oekyan vote, oakwuk nu ke sulosol elya, luma a naweyan sramsram in eyense a kutena oiya ma eneneyuk nu ke sulosol mwo a sumwos. Lelu Town ku in orekmakin pepu ke met ku in vote lun Kosrae State ma mwo nuke sulosol lun Lelu Town ma met san simla mu el met Lelu se.

Section 5. Vote nu ke mwe nunak ku in orek nu ke kutena oiya ma touyak ke petition ma saini sin met tia supus liki sie tafwu singuul ke met nukewa oasr e ke book in vote lun Lelu Town. Petition ouinge fwin sun Sroasr Masap ku Office lal Mayor, kain in sulosol se inge ku in srokakinyukla, fwin petition san ituk ke inmasrlon malem onkosr nuke sie sulosol akwuk, oiya se a nunkeyuk an a fwa itukynag nuke pepu in vote ke sulosol san, sayen fwin petition san siyuk met an in sa vote ka. Petition san enenu in fuliya nunak san ku kusa ma a topukyuk ke "Aok" ku "Mo".

Section 6. In ku in vote Lelu sie met el enenu in met Federated States lun Micronesia, muta fwin an Kosrae, a pepu Lelu, matwal oasr ke year singoul- oalkosr yak, a el met oasr pepu in vote la. Met maskin insifwa a oayapa met kunaosla masap yok fwin soena oasr nunak munas nu sel tia lela in vote su a fwa akkalemyeyuk ke pusren masap.

Section 7. Term lun Sroasr Masap a Mayor lun Lelu Town Government a fwa mutawaak a safla infulwen len ke Thursday se akluo ke January tukin solla, sayen met solla ke vote elya ku srisrisr sel Mayor a mutawaak tukin akkeyeyukla ke vote ku srisrisr.

ARTICLE XI. SISILA A OSRWOSRLA

Section 1. Wal fulat nukewa ma suleyukla nu ke Lelu Town Government welulang Nununku a ku in tulokinyuki ku itukla liki office. Oakwuk nu ke fwala lun sisila inge a fwa oana ke oakwuki ke masap se inge a kutepana masap lun Lelu Town Government.

Section 2. Kais sie met kol lun Lelu Town Government su suleyukla ke vote welulang met Nununku ku in nununkeyuk in itukla liki wal lal fwin oasr akilenya mu el kunaosla masap yok ku fwasr sayen oakwuk. Oiya se inge ku in sikyak fwin sie tafu tolu ke met nukewa oasr e ke book in vote lun Lelu Town signed sie pepu in tukak siyuk in itukla wal lun met fulat san ke sripa enenu in akkalemyeyuk. Tukin Sroasr Masap ke Lelu Town Government eis pepu in tukak a akpayeye la tia srik liki sie tafu tolu ke met nukewa oasr e ke book in vote lun Lelu Town signed, elos a fwa pangon sie meeting silaklak in konaak a akpayeye mwe tukak ke pepu in tukak. Sroasr Masap fwin konaak ke meeting lalos kalem tu paye la oasr ma tukakinyuk inge, a fwin luo tafu tolu selos insese in itukla wal lun met tukakyak na elos fwa oru sie vote in nakla seat lal sayen el fwin sie met Nununku, Mayor el a fwa srisrngiya sie aolyal fwal nuke oakwuk lun masap.

Section 3. Orekmakinyen money lun office se inge fwin tia fwasr fwal nuke ma oakwuk nuka, e tufwa putatyang nuke sripa lun sisila a osrwosrla ye Article se inge. Met voteiyuk ku srisrngiyuki nukewa a tufwa karunginyuk ke oakwuk se inge.

(Section 3, naweyukla 2019 3rd Lelu Charter Commission).

ARTICLE XII. KUTUPA OAKWUK YOK

Section 1. Wangin masap lun Lelu Town a fwa orekmakinyuk fwin ma a akfosye Charter lun Lelu Town a oakwuk lun masap lun State a National Government.

Section 2. Masap lun Lelu Town Government a fwa usyuk a karunginyuk sin met in karungin masap lun State, wi pa Officers ke Lelu Government. Ku lun met karungin masap lun State a fwa akilenyuk a tia pilesreyuk sin met lun Lelu Town Government. Mayor el a fwa srisrugi Town Police wi lolngok a akkeyela lun luo tafu tolu sin Lelu Town Sroasr Masap. Lelu Town Police Officers a tufwa orekma a fwasr ke masap, oakwuk, a oiya ma oakwuki sin Lelu Town Government.

Section 3. Ne ke pal fwal lun Lelu Town Government in oakiya nien Nununku la, fines, fees Nununku oakiya moul ke money ke sripen kunaosla ke masap Lelu Town, ma inge enenu in fuliyuki ke funds lun Lelu Town Government.

Section 4. Len sanri in oakwuki tu in len in mongla se. Orekma eneneyuk a ma saya su a fwa oakwuki ke masap.

Section 5. A fwa oasr legal holidays lun Lelu Town Government oakwuk ke pusren masap, State a National holidays a fwa akilenyuk sin Lelu Town Government.

Section 6. A fwin tu akkeyeyukla ke luo tafu tolu ke vote lulap san ke vote ma orekla an, na a akkeyela Charter se inge.

Section 7. Tu Lelu Town Government, in oakia ke masap, tu in oasr kutu fair lun met Lelu, akfwasryeyuk ke kais sie year. Fwinsrak lun fair inge pa in lela pal lun met Lelu in kukakin a moli kasrpalos a tukeni sie sin sie in mukuikui. Office lun an Lelu a fwa tia eis molin pepu in kuka, tax a kutena moul sin met nukewa Lelu ma oasr kasru la nuke fair inge.

Section 8. Sroasr Masap enenu in orek public meeting in sramsramkin nusin met u ke ma nukewa ma yok sripa met u enenu in wi orala nunakla nuka, su tia kaliya nuke orala lun lemlemeyen masap, sramteyukyak lun orekma yok, pwapa nuke development projects, ma a tu liksreni mokleak met fwin an Lelu. Meetings nukewa enenu in akfwasryeyuk meet liki orekla sulala safla ku mutawaak lun orekma lulap nukewa. Sroasr Masap enenu in eis nu in mwe nunak lalos ngetnget a mwe nunak nukewa su ma touyak sramsramkinyuk ke pal ma meeting inge orek u.

Section 9. A tufwa ma kunal Mayor elan pangon meeting lun met Lelu in tukeni sramsramkin fasin ku oiya matu ma akkolukye mutangan met Lelu ku kutepana oiya ma fwal in nawu kasrpalos.

Section 10. Lelu Town Government a tufwa akilen oana sie lun met nukewa, tia srela ke sra lalos, la met mukul ku met mutan, matwa, wal ku kasrpalos, a lalalfongi. Met nukewa a tufwa karunginyuk ke oiya fwal nuke enenu lalos, a tia srela ke oiya nukewa ke kasru lun Government, a itukyang sumwos lun met nukewa oana sie.

(Section 10, itukyang 2019 3rd Lelu Charter Commission)

ARTICLE X11I. NAWEYUK

Section 1. Charter lun Lelu town ku in ikilyuk ke luo tafu tolu sin Sroasr Masap lun Lelu Town, a akkeyeyukla sin luo tafu tolu ke met orala vote la an.

Section 2. Met u ku in ikul Charter lun Lelu Town fwin sie tafu tolu ke met nukewa oasr e ke book in vote lun Lelu Town signed sie pepu in ngusr siyuk in ikilyuk, a fwin luo tafu tolu ke vote ma orekla ke vote san insese.

Section 3. Ya singuul (10) nukewa, Sroasr Masap a fwa srkak nusin met u kisensiyuk se inge: Ya enenu in oasr tukeni lulap se in nawu Charter lun Lelu Town? Fwin inkaiyen vote nuke kisensiyuk se inge insese nuka, met a tukeni in nawu Charter Lelu a tufwa solla sel Mayor tia pat liki len yunguul(90). Naweyuk sasum ma lumeyuk sin Charter Commission enenu in itukyang in voteiyuk ke sie vote lulap a mutawaak orekmakinyuk fwin akkeyeyukla sin met vote Lelu. Sie lemlem in naweyuk sasum nuke Charter se inge a fwa luo-tafu-tolu ke met wi votei naweyuk san insese.

ARTICLE XIV. KAS

Section 1. Kalmen kas Kosrae a English ke koanon Charter lun Lelu Town ku a sumwos sifwana. Fwin elya ku fos sikyak ke kalmen koano an, kas Kosrae an pa a ukeyuk u.

Section 2. Masap nukewa lun Lelu Town enenu in simla ke kas Kosrae a English. Masap nukewa enenu in oasr nutin Office lal Governor, Office lal Speaker, Office lal Chief Justice, a touyak pa nuke an met nukewa ku in akilen a eis etaak ka.

ARTICLE XV. FULAK KE OFFICE

Section 1. Tukin sukok nukewa safla, met solla enenu in eis fulak lalos meet liki elos eis kulansap lalos. Fulak ke office a fwa ouinge:

“ Nga, _____, fulak tu nga fwa akfulatye a karingin Charter a masap lun Lelu Town Constitution a masap lun State Kosrae, a nga fwa kusakunyuyang in oru orekma lun office kunuk nofon nuke enenu lun met u ke kuiyuk nofon.

Ouinge God elan kasreyu.”

ARTICLE XVI. EKLA LUN CHARTER

Section 1. Charter lun Lelu Town a mutawaak orekmakinyuk ke Tuesday se akluo ke January 1989, tusruk tu, sulosol se omeet ke Charter se inge a orek ke Tuesday se omeet tukin Monday se omeet ke November, 1988. Pulan pal in kunokon lun met kol ma solla ke sulosol se inge a mutawaak infulwen len ke Tuesday se akluo ke January 1989.

Section 2. Masap nukewa orekmakinyuk ke Lelu Municipal Government ke sun pal se ma mutawaak orekmakinyuk Charter se inge a tutaflana, sayen fwin a tu tia fwasr fwal nuke Charter se inge, ku fwin sifwil naweyukla, akwuki, ku sie pal in safla sifana.

Section 3. Sayen fwin tia akkalemeyeyuk ke Charter se inge, sumwos, fwin ma la mukuikui nuke sukyen sumwos, nu in nununku, welala, nununkeyen ma enenu in akfwalyeyuk, sap simla sin nununku, oiyan mukuikui nuke sukyan sumwos, nununkeyen sie met, ma wotla sin nununku, kaiyuk sin nununku, sap ku, sap lun met kol sumwos, langoyen mukuikui, akkalemeyeyan sumwos la, a sapkin enenu nukewa a tutafla na.

Section 4. Government sasu se ye Charter se inge pa a tafwela sumwos nukewa su oan ye poun government se meet a, a fwa eis kunokon a akfwalyeyan mukuikui nukewa ma orekla sin government se meet an.

Section 5. Met orekma nukewa lun government se meet a a tafwela na kunokon lalos ye Charter se inge, sayen fwin pusren masap fwakla siena.

(Naweyukla ke March 2019 3rd Lelu Charter Commission)